

吾學錄初編



吾學錄初編卷二

三原李彭紹錢校刊

鑒重纂五部纂都察司都察院編纂處吳榮光恭述

政術門

戶籍

查戶口○辨籍貫○編保甲○防盜賊○禁

查戶口

○會典各省諸色人戶有司察其數而歲

報於部曰煙戶男年十六曰丁女曰口未成丁亦

曰口丁口繫於戶腹民計以丁口邊民計以戶凡

丁輸賦者以康熙五十年爲額歲編審有羨餘曰

盛世滋生人丁永不加賦○直省各府州縣編賦役冊

以一百一十戶爲里。推丁多者十人爲長。餘百戶爲十甲。甲凡十人。歲役里長一人。管攝一里之事。城中曰坊。近城曰廂。鄉里曰里。凡十年一周。先後則以丁數之多寡爲次。每里編爲一冊。冊首總爲一圖。其鰥寡孤獨不任役者。則帶管於百一十戶之外。而列於圖後。名曰畸零。

辨籍貫○會典凡民之著於籍者。曰民籍。曰軍籍。

屯衛之兵遺犯之子孫皆是。

曰商籍。

商人子弟隸附於行商省分者。

曰竈籍。

各鹽

場并

竈丁。禁其冒籍跨籍者。他省人於寄居地方。置有

墳廬已逾二十年者。准其入籍。是爲寄籍。其原籍
爲祖籍。出仕者祖籍寄籍一體迴避。文員罷職不
准寄居官所。不得於任所地方置買田宅。如本身
已故。子孫於他省有田地丁糧。願入籍者。聽武職
罷任後。原籍無產業宗族可歸。願於任所入籍者。
副將以上。由督撫具奏請。

旨。叅將以下。報部准其入籍。叅將以下。於任所置產業
錢糧。照民賦輸納。軍流人等子孫。隨配入籍者。准
其考試。十年限滿後。由配所督撫報部查覈。○凡

籍有良賤。四民爲良。奴僕及娼優隸卒爲賤。山西
陝西之樂戶。江南之丐戶。浙江之惰民。皆於雍正
元年七年八年先後豁除賤籍。如報官改業後。已
越四世。親支無習賤業者。准其應考出仕。其廣東
之蛋戶。浙江之九姓漁戶。皆照此例。凡衙門應役
之人。除庫丁斗級民壯。仍列於齊民。其阜隸馬快
小馬禁卒門子弓兵件作糧差及巡捕營番役。皆
爲賤役。長隨亦與奴僕同。其奴僕經本主放出爲
民者。令報明地方官。咨部存案。俟放出三代後。所

生子孫。准與平民應考出仕。京官不得至京堂。外官不得至三品。放出後未經呈報。仍以補報之日起限。○凡官之寄籍外省。願改歸原籍者。查原籍果有墳墓廬舍。由祖籍官咨部准其復籍。其由吏員出身者。歸宗復姓改籍皆禁。

編保甲○會典保甲之法。戶給以門牌。書其家長之名。與其丁男之數。而歲更之。出註所往。入註所來。戶有遷移。隨時換給。十家爲牌。牌有頭。十牌爲甲。甲有長。十甲爲保。保有正。皆以誠實識字有身

家者充。限年更換。稽其犯令作慝者。如盜竊邪教賭博製造賭具窩逃。姦拐私鑄私銷私鹽販賣硝磺。並私立名色。斂錢聚會。及面生可疑。形迹詭秘之徒。皆令查報。○各府州廳縣所屬城廂市鎮村屯。土著軍民。自搢紳以至商賈農工吏役兵丁。皆挨戶編審。客民在地方開張貿易。卽與土著一律挨編。其往來無定之商賈。令客長稽察。至客商投寓店埠。皆令店主埠頭。詢明來歷。並騎馱夥伴。去來日月。循環冊報。山居棚民。按戶編冊。令地主保。

正結報。寺觀僧道。令僧綱道紀。按季冊報。

防盜賊○會典地方編排保甲。保正甲長牌頭。須選勤慎練達之人點充。如果訪查盜賊據實舉報。按名給賞。儻有瞻徇隱匿。卽予懲警。甲長照牌頭減一等。保正減二等。若牌頭於保正甲長處舉報。而不行轉報者。牌頭免坐。甲長保正。照例治罪。賭博爲盜賊淵藪。令保甲一併查舉。再地方有堡子村莊。聚族百人以上。保甲不能編查。選族中有品望者。立爲族正。如有匪類容隱。照保甲一體治罪。

禁流丐○會典各省地方官。凡遇流丐在境。務須督率保甲人等。諄切曉諭。仍不時留心察訪。如有逞強不法者。卽嚴拿懲治。不必遞解回籍。

農務

勸耕種
捕蝗伐蛟

○墾荒地○修隄防○田禁穀禁○

勸耕種○會典凡勤耕務本之農。該管官時加獎勵。每州縣量設老農數人。以爲董率。察其勤儉無過者。准給八品頂戴。歲遇農忙。則停徵停訟。以勸農事。

墾荒地○會典各省實有可墾荒地。招徠報墾。酌

借牛種限以水田六年旱田十年准其陞科永爲
已業將屆陞科之期該督撫委員復加丈勘果有
坍塌沖漲或磽确者仍免其陞科其有自費工力
挑築池塘渠堰者准照定界蓄水灌溉他人竊放
灌田照盜種田畝律科罪以勸墾荒惟池澤陂蕩
蓄水處所無論官地民地概禁開墾瀕臨江海湖
河沙漲地畝如有阻遏水道爲隄工之害者禁其
報墾以禦旱潦。

修隄防○會典凡水利之應治者有官工有民工

其無官修定款者。皆由民修。或借庫項興工。攤徵歸款。或地方官隨時督率民夫。加培疏濬。除款項無多。無關緊要者。聽民間自行辦理。如係要工。經費逾五百兩者。俱一體報部覈銷。定保固限期。以杜侵冒。

田禁穀禁○會典凡山隰土田。阡陌相連。宜穀之處。禁種煙草。官兵軍民行獵。及出青馬駝。踐躪田禾。除懲處外。仍追糧銀給主。以禁防稼。○所在州縣。飭查製麴燒鍋。以禁糜穀。

捕蝗伐蛟○會典各省瀕臨湖河低窪之處令該
管官於每年二三月豫防蝻子化生一有萌動卽
多撥兵夫撲捕或掘地取種或於水涸草枯時縱
火焚燒併涇移鄰封協捕如致長翅飛騰根究生
蝻處所治以捕蝗不力之罪

謹案蝻子有化生卵生二種化生者先見於大
澤之涯及驟盈驟涸之區魚蝦散子草間在水
則仍化爲魚蝦惟有水而涸春夏風日薰蒸濕
熱變而爲蝻長卽成蝗故涸澤有蝗葦洲有蝗

卵生者卽上年蝗之遺種。蝗性喜燥惡濕。必擇堅硬黑土高亢之處。用尾錐入土中。深不及寸。仍畱孔竅狀如蜂窩。其內有子。形如豆粒。中止白汁。漸次充實。因而分顆。一粒中有細子百餘。來年滋生不已。爲害甚鉅。故捕蝗不如捕蝻。捕蝻不如滅種。蝻性畏雪。交冬得雪一寸。蝻子卽深一尺。積雪盈尺。則蝻子不萌生。若是年冬無大雪。則明年復起。故爲害最烈。

山中出蛟。每爲水患。蛟卵入地之處。冬不積雪。令

所在居民畱心宅除。

謹案蛟似蛇而四足。細頸頸有白纓。本龍屬也。其孕而成形。率在陵谷間。乃雉與蛇當春而交。精淪於地。聞雷聲則入地成卵。漸次下達於泉。積數十年。氣候已足。卵大如輪。其地冬雪不存。夏苗不生。鳥雀不集。土色赤。有氣朝黃而暮黑。星夜視之。黑氣上沖於霄。卵既成形。聞雷聲自泉間漸起而上。其地之色與氣亦漸顯而明。蛟未起二三月前。遠聞似秋蟬。悶在人手而鳴。

又如醉人聲。此時能動不能飛。可以掘得。及漸起離地三尺餘。聲響漸大。不過數日。候雷雨卽出。攻治之法。在夏末秋初。善識者先於冬雪時。視地圍圓不存雪。又素無草木。復於未起二三月。春夏之間。視地之色與氣。掘土三五尺餘。其卵卽得。大如三斛甕。先以不潔之物。或鐵與犬血鎮之。多備利刃剖之。其害遂絕。蛟畏金鼓及火。山中久雨。夜立高竿。掛一燈籠。可以避蛟。夏月田間作金鼓聲。以督農務。則蛟不起。卽或起。

而作波。但搥鼓鳴鉦。多發火光以拒之。水勢必退。

津梁

修橋道○設渡船浮橋○救生船○救生椿

修橋道○會典各省橋道有損壞者。地方官查明隨時建置。由該督撫奏明辦理。報部覈銷。

設渡船浮橋○會典水陸通衢。額設渡船浮橋。隨時補脩。或分別年限修造。各視其地之衝僻以爲差。

救生船○會典遇水道危險之處。額設救生船。三

年小修。五年大修。如內河戰船之例。

救生椿○會典安徽洪澤湖設立救生椿以資拯濟

倉儲

常平倉 裕備倉 ○社倉 義倉

常平倉 裕備倉 ○會典各州縣設立常平倉視其地之廣狹以定額貯所貯各色糧石皆按其出產準作穀數其折耗曰氣頭曰廩底均計收貯年分及地氣燥濕以定其數准該管官驗明米色秋後買補常年平糶皆以存七糶三爲率間有燥濕不